



Arkivsaksnr: 2022/4541-0

Sakshandsamar: Marthe Gjerde

Dato: 09.06.2022

Utval	Utvalssak	Møtedato
Jostedalsbreen nasjonalparkstyre	21/22	20.06.2022

Jostedalsbreen nasjonalparkstyre - dispensasjon frå verneforskrifta for innsamling av belegg til artsbestemming - Tungestølen

Innstilling frå forvaltar

Med heimel i naturmangfaldlova § 48 får Vegetasjonsrådgiver Tanaquil Enzensberger løyve til å ta belegg for å artsbestemme planter, sopp og lav i samband med utarbeiding av skjøtelsplan kring Tungestølen i Jostedalsbreen nasjonalpark. Løyvet gjeld fram til 15. november 2022.

Det er knytt følgjande vilkår for løyvet:

1. Løyvet gjeld personell som utfører feltarbeid i samband med utarbeiding av skjøtelsplan kring Tungestølen.
2. Det skal ikkje samlast inn belegg dersom det kan medføre fare for at arten blir borte lokalt (jf. § 9 «føre-var-prinsippet» i naturmangfaldlova).

Saksprotokoll i Jostedalsbreen nasjonalparkstyre - 20.06.2022

Handsaming i møte

Vedtak i samsvar med innstilling frå forvaltar.

Vedtak

Med heimel i naturmangfaldlova § 48 får Vegetasjonsrådgiver Tanaquil Enzensberger løyve til å ta belegg for å artsbestemme planter, sopp og lav i samband med utarbeiding av



skjøtselsplan kring Tungestølen i Jostedalsbreen nasjonalpark. Løyvet gjeld fram til 15. november 2022.

Det er knytt følgjande vilkår for løyvet:

1. Løyvet gjeld personell som utfører feltarbeid i samband med utarbeiding av skjøtselsplan kring Tungestølen.
2. Det skal ikkje samlast inn belegg dersom det kan medføre fare for at arten blir borte lokalt (jf. § 9 «føre-var-prinsippet» i naturmangfaldlova).

Saksopplysningar

Dokument i saka:


- Prioritering av planarbeid Tungestølen - skjøtselsplan 2022 - Jostedalsbreen nasjonalparkstyret, ST 5/22
- Skildring av oppdrag, Skjøtselsplan for heilskapleg kulturlandskap i områda kring Tungestølen og Nystølen på Veitastrond i Luster kommune, datert 10. mai 2022
- E-post med søknad om belegg av artar frå Tanaquil Enzensberger, datert 3. juni 2022
- Verneforskrifta for Jostedalsbreen nasjonalpark
- Naturmangfaldlova

Bakgrunn:

Vegetasjonsrådgjevar Tanaquil Enzensberger søker om dispensasjon frå verneforskrifta for å kunne samle inn belegg av karplanter, mosar, sopp og lav der det er naudsynt for å sikkert kunne bestemme rett art. Ho skriv at det i sjeldne tilfelle gjeld planter, og oftare sopp, mose eller lav.

Enzensberger skal på oppdrag frå nasjonalparkstyret i 2022 utarbeide ein skjøtselsplan for heilskapleg kulturlandskap i områda kring Tungestølen og Nystølen på Veitastrond i Luster kommune. Oppdraget skal gjennomførast i nært samarbeid med Jostedalsbreen nasjonalparkstyret v/forvaltarane. Føremålet med oppdraget er å utarbeide ein skjøtselsplan for det heilskaplege kulturlandskapet i kring desse stølane, slik at ein lettare skal kunne prioritere tiltak som gir størst effekt for å betre naturtilstanden og tilstanden til kulturlandskapet i planområdet, både innanfor Jostedalsbreen nasjonalpark og utanfor. Resultatet skal presenterast i ein rapport.

Skjøtselsplanen skal dekkje det heilskaplege kulturlandskapet i området kring Tungestølen og Nystølen, sjå kartfigur under. Feltarbeidet skal utførast i perioden 1. juli – 15. november 2022.



Kartet illustrerer avgrensning av planområde (raud strek) og områda med NiN-kartlegging i dei delane av Langedalen og Austerdalen som ligg innanfor nasjonalparkgrensa som blei gjennomført i 2017 (grøn).

Lovgrunnlag:

Føremålet med vernet av Jostedalsbreen nasjonalpark er, jamfør forskrifta datert den 25. oktober 1991:

- å verne eit stort, variert og verdfullt breområde med tilhøyrande område frå lågland til høgfell, med plante- og dyreliv og geologiske førekomstar i naturleg eller i det vesentlege naturleg tilstand
- å gje høve til naturoppleving gjennom utøving av tradisjonelt friluftsliv som er lite avhengig av teknisk tilrettelegging
- å verne om kulturminne og kulturlandskap

All vegetasjon, medrekna daude buskar og tre, er verna mot all slags skade og øydelegging, jf. kap. IV, § 2.1. i verneforskrifta, men nasjonalparkstyret eller den dei gjev fullmakt, kan vurdere å gjere unntak frå vernereglane m.a. for vitskaplege undersøkingar, jf. naturmangfaldlova § 48, dersom omsøkt tiltak eller aktivitet ikkje strir med verneføremålet, og ikkje vil påverke verneverdiane nemneverdig.

I tråd med naturmangfaldlova § 7 skal prinsippa i §§ 8-12 leggjast til grunn som retningslinjer ved utøving av offentlig mynde som kan påverke naturmangfald, og det skal gå fram av avgjerda korleis desse prinsippa er vurdert og vektlagt i saka.



Vurdering

Førekost av karplanter, mosar, sopp og lav er dårleg kjent i nasjonalparken, og det er ønskeleg å auke kunnskapsgrunnlaget for desse artsgruppene. Nokre artar kan ikkje artsbestemast sikkert i felt, og må samlast inn om ein skal klare å fastslå kva art det er.

Kunnskapsgrunnlaget om konsekvensane av naudsynt innsamling av belegg av planter, sopp og lav blir vurdert som godt (jf. naturmangfaldlova § 8). Kunnskapsgrunnlaget vurderast å vere tilstrekkeleg i denne saka slik at det ikkje er naudsynt å ta i bruk nml § 9, «Føre-var-prinsippet».

Den samla belastninga på flora og funga (soppflora) i området blir vurdert å vere låg (jf. naturmangfaldlova § 10). Å ta belegg etter standardiserte metodar er viktig for dokumentasjon av biologisk mangfald, og vi er kjent med at søkjar har erfaring med slikt arbeid og god kjennskap til artane sitt livsmiljø og til nasjonal førekost og utbreiing. Innsamling vil særleg vere retta mot sjeldne og lite kjende artar. Vi føreset at det blir tatt omsyn til artane si vidare overleving i området (jf. naturmangfaldlova § 12). Prinsippet om kostnad ved miljøforringelse vurderast som ikkje relevant (nml § 11).

Resultata frå undersøkinga vil inngå i framtidig kunnskapsgrunnlag for forvaltning av nasjonalparken. Betre kunnskap om kva artar som er knytt til ulike miljø, vil kunne gi oss kunnskap om det vil vere behov for skjøtselstiltak.

Med vilkåra over meiner vi at innsamlinga ikkje vil påverke naturkvalitetane nemneverdig. Nasjonalparkforvaltar vurderer at ei omsynsfull og kritisk innsamling for vitskapleg føremål ikkje er i strid med verneføremålet, og vilkåret i fyrste avsnitt i naturmangfaldlova § 48 er difor oppfylt.